

Headline	Perak timbang persetujuan iktiraf Royal Belum sebagai Tapak Warisan Dunia		
MediaTitle	Utusan Borneo Sarawak		
Date	11 Oct 2018	Color	Black/white
Section	News	Circulation	32,799
Page No	14	Readership	98,397
Language	Malay	ArticleSize	190 cm ²
Journalist	N/A	AdValue	RM 708
Frequency	Daily (EM)	PR Value	RM 2,125



Perak timbang persetujuan iktiraf Royal Belum sebagai Tapak Warisan Dunia

IPOH: Kerajaan negeri Perak sedang menimbang permintaan Kementerian Pelancongan, Kesenian dan Kebudayaan untuk menjadikan Taman Negeri Royal Belum di Gerik diiktiraf sebagai Tapak Warisan Dunia oleh Pertubuhan Pendidikan, Sains dan Kebudayaan Pertubuhan Bangsa-Bangsa Bersatu (UNESCO).

Menteri Besar Ahmad Faizal Azumu berkata ini kerana sekiranya persetujuan diberi, ia sekali gus akan menjejaskan kewangan negeri apabila penebangan balak tidak dapat dilakukan lagi di kawasan itu, sedangkan kegiatan itu memberi pendapatan kepada kerajaan negeri.

“Tidak adil kalau kita hentikan segala aktiviti pembalakan, kerana kerajaan negeri akan dinafikan daripada sumber kewangan yang cukup untuk memberi perkhidmatan yang terbaik kepada rakyat,”

katanya kepada pemberita selepas bersiaran selama satu jam di PerakFM di Jabatan Penyiaran Malaysia Negeri Perak di sini semalam.

Sehubungan itu beliau meminta kerajaan persekutuan mencadangkan atau mencari jalan agar Perak peroleh sumbangan yang memadai sekiranya Royal Belum hendak diiktiraf sebagai Tapak Warisan Dunia.

“Di Royal Belum banyak masalah yang dihadapi yang memerlukan perbelanjaan tinggi bagi mengawal penorekaan pembalok haram, kerakusan pemburu haram membunuh Harimau Malaya yang telah hampir pupus dan untuk kawal kita perlu perbelanjaan yang banyak,” katanya.

“Perkara (pengiktirafan) ini perlu ditimbang, saya minta kerajaan persekutuan benar-benar memahami kerajaan negeri, walaupun kita

sambut baik apa yang sedang diusahakan itu,” tambahnya.

Kelmarin, Timbalan Menteri Pelancongan, Kesenian dan Kebudayaan Muhammad Bakhtiar Wan Chik berkata pihaknya sedang mendapatkan persetujuan daripada beberapa kerajaan negeri untuk membolehkan empat lagi destinasi di Malaysia diiktiraf sebagai Tapak Warisan Dunia oleh UNESCO.

Katanya empat tapak itu adalah Taman Negara, Royal Belum di Gerik, Permatang Kuarza di Gombak, dan Institut Penyelidikan Perhutanan Malaysia (FRIM).

Pada masa ini empat tapak di Malaysia diiktiraf UNESCO sebagai Tapak Warisan Dunia iaitu Georgetown, Pulau Pinang dan Melaka; Lembah Lenggong di Perak; Taman Negara Kinabalu di Sabah dan Taman Negara Mulu di Sarawak. — Bernama